

摘藻堂四庫全書薈要

集部

欽定四庫全書會要

聖祖仁皇帝御製文第二集卷二十四目錄

北征勅諭

諭皇太子 十五條

欽定四庫全書薈要卷一萬三千五十二

集部

聖祖仁皇帝御製文第二集卷二十四

北征勅諭

諭皇太子

三月十九日尼麻唐胡圖克圖卓爾莫隆喀木布到前
已遣報其中情事因彼甚為秘密故未詳悉書寫今此
事俱已明顯殊覺怪異於是不以為煩將始末詳悉書
寫遣發令皇太子知之可細閱焉尼麻唐胡圖克圖到

後朕念達賴喇嘛夙昔和順因體伊等秘密之意將尼

麻唐胡圖克圖卓爾莫隆喀木布令近至御前朕左右

惟有一等侍衛關保海青三等侍衛喇西餘無他人伊

等奏云老達賴喇嘛成年已故小達賴喇嘛已生今年

十五歲我等地方仗達賴喇嘛以存達賴喇嘛身故之

時卽欲奏聞竊恐生變又因喇嘛遺言及白賴奔奈冲

奈冲者與巫覡相同
降神推測之喇嘛

之言必令待至相合年歲始聞知

天朝皇帝及衆施主故於今年十月二十五日始出禪

定令衆參拜此事諦已於差遣我等時令於佛前立誓
必親見皇上密奏其他處俱以達賴喇嘛出禪遣告而
未明悉其故奏訖朕將伊奏章并所獻達賴喇嘛之像
於原封之外面同伊等加封押以鈐記乃諭之云朕數
年來久知達賴喇嘛已故若達賴喇嘛尚存則參木巴
秦木布胡圖克圖噶爾丹西勒圖七七克塔賴喀木布
濟隆胡圖克圖等斷不如此妄行喀爾喀厄魯特亦不
致破壞故朕降以嚴旨今諦已輸誠吐實密以奏朕朕

亦密藏之俟十月初旬啓封宣示內外四十九旗喀爾喀衆渣克薩令為已故達賴喇嘛誦經致贈為小達賴喇嘛遣使稱賀既降諭旨於是命寫勅書其辭曰諭掌瓦赤喇坦喇達賴喇嘛教弘宣佛法王布忒達阿布迪朕臨御天下統理萬邦溥播仁恩懲創亂逆其抒誠恭順者則必嘉獎眷愛焉爾布忒達阿布迪先與噶爾丹同謀凡事惟左袒厄魯特而行將債事之濟隆胡圖克圖堅留不遣其時朕以為達賴喇嘛若在斷然不致如

此故特降嚴旨於爾覽爾奏奉聖主嚴綸訓誨心甚憂
懼今惟謹遵皇上諭旨竭力黽勉自知過愆引罪陳奏
朕與達賴喇嘛道法協一多歷年所有不垂念之理乎
且爾土白特國朕若不撫愛垂顧得以安生樂業乎濟
隆胡圖克圖乃達賴喇嘛特遣以和合喀爾喀厄魯特
之人彼不和解喀爾喀厄魯特反導引厄魯特入喀倫
之內與我師相戰情罪殊為可惡務必送至朕依爾所
奏請從寬宥其身命全其戒律班禪胡圖克圖應於何

年月日前來爾從容定期具奏噶爾丹與我抗拒為我師所大敗兇逆之寇情罪重大瑚瑚腦爾決不可存留其女爾必令送至若不遣送則咎在汝矣噶爾丹若伏罪投順其時另降勅旨今尼麻唐胡圖克圖至以爾奏請之語俱密奏於朕前朕亦密降諭旨朕之素志惟欲普天率土咸躋雍和同臻安樂以此惓惓於懷若摘發隱事以傾人國斷不為也嗣後爾益加恭順不違朕旨以行朕亦棄爾前非嘉惠如初如此則爾土之民得沾

利益而爾亦常享顯榮不替矣為此特遣正使理藩院
主事保住副使主事薩哈連頒此諭旨并賜緞六端二
十八日引見二十九日之晨遣行是日晚遣往策汪拉
布灘處司務英固至奏云臣從波羅塔拉回因部中遣
往策汪拉布灘咨文到卽持此咨文返至策汪拉布灘
處策汪拉布灘甚喜卽遵旨領兵搜剿噶爾丹而來距
薩克薩圖胡魯克二十日之程有達賴喇嘛之使達爾
罕厄木七到彼言達賴喇嘛已故十六年小達賴喇嘛

已十五歲矣全爾等各安居本土不必起兵遂按兵而退臣知其不能有濟亦還達賴喇嘛之事西北諸人皆已聞之等語是日阿南達奏稱噶爾丹多爾濟遣人來云瑚瑚腦爾之渣木已稜喀木布致書有令我整備器械來與瑚瑚腦爾會盟之語我今屬聖主之人向來從未與瑚瑚腦爾之盟故我未前赴煩將此情事奏聞因其如此朕欲為達賴喇嘛秘密其事亦屬徒然且應詢問之事復多遂將尼麻唐胡圖克圖召回於初二日復

至令諸臣傳旨諭之曰爾等秘密之事朕垂念達賴喇嘛深秘密之槩不以告人今爾之使達爾罕厄木七等皆已傳布盡人皆聞朕獨秘密之何益爾等可與喇嘛等公同啓封將奏章翻譯并觀達賴喇嘛之像因令此地喇嘛與尼麻唐親將封啓視泥塑達賴喇嘛之像其頭項處斷落在旁其時喇嘛等及諸臣凡所閱之人皆相驚訝云此事若於伊等去後開視或於十月開視以致如此我等殊覺索然天心與聖主每相符合正當尼

麻唐猶未遠去而英固等適至乃伊等親身明晰此事
本末皇上之誠信優待達賴喇嘛之處亦昭著矣十六
年以來種種假託達賴喇嘛之言俱已顯然達賴喇嘛
果有知亦應感戴聖主而不能不致憾於諦已由此觀
之諦已於土白特國所為不善不言可知矣因無不贊
頌而尼麻唐等甚為惶悚頓爾仆地口不能言惟自嗟
怨此乃我等惡兆而已諦已奏章云總統天下率土威
福丈殊菩薩至聖皇帝蓮花清淨座下謹奏言為衆生

不幸第五世達賴喇嘛於壬戌年身故自

太宗皇帝道法合一癸巳年至京師道法合一以來此地佛門最大者達賴喇嘛世間最大者壽與天同明竝日月大護法主人一應事情意雖切欲陳奏奉掌管占卜護持經典白賴奔柰冲之旨但召親近侍奉之人達賴汗達賴巴圖爾告知之此外雖各親屬是年以前皆勿告語欲將此故陳奏心殊懇切但達賴喇嘛之旨及護持經典柰冲語甚嚴切故未能陳奏惟聖明鑒之第

六世轉生淨體因有避忌尚未參拜俟至其年月日時
奏知壽與天同至聖天朝皇帝大護法主始令衆聞知
至所指定避忌之時至聖皇帝之外餘皆勿使聞之將
護持經典柰冲所戒情由遣尼麻唐胡圖克圖卓爾莫
隆喀木布等密奏惟明鑒之訓誨諭旨垂愛不絕其出
舍利焚葬等事推算未及於此故爾完厝今因齋奏章
為利益生靈於壽與天同護法主人前獻便於供養達
賴喇嘛之像乃臨終牀簀之鹽拌和塑成此喇嘛像若

欲一心虔供陳設香燭意謂當獲福慶謹將喇嘛像并上等珍寶數珠氍毹等物於七月初旬吉日謹奏又經典一部載寫達賴喇嘛之始末及生死遺言因其繁多翻譯甚需時日在此喇嘛不能翻譯事務亦不甚緊要待章佳胡圖克圖到日譯完再遣觀此等情事十六年間朕所差往喇嘛等欺誑於朕至於已極無可憑信惟順諦已之意總非實語此中丹木巴塞爾卽堅稱親見達賴喇嘛尤屬可惡皇太子率理藩院大臣官員將默

爾根綽爾卽以下喇嘛等俱傳集於梅檀寺將此情由
說知卽將丹木巴塞爾卽拏問併其徒俱拘於理藩院
彼二處所有房舍俱令封守今年正月初一日朕躬及
皇太子問默爾根綽爾卽倡言達賴喇嘛尚在今何以
實蹟顯露由此觀之飼犬尚能吠面生之人猶為有益
豢養爾等喇嘛全然無益以此言譴責羞辱之將此十
六年來遣往西域喇嘛等俱令清查各取口供啓奏喇
嘛等今作何狀亦寄信來此情事令大臣看閱并於

皇太后前口奏大略以

聞康熙三十六年閏三月初五日

諭皇太子

朕至此以儀器測驗北極較京師低一度二十分東西
相去二千一百五十里今安多以法推算言日食九分
四十六秒日食之日晴明測驗之食九分三十幾秒並
未至昏暗見星自寧夏視之京師在正東而微北初三
日雨此並令知之兼示諸臣康熙三十六年閏三月初

五日

諭皇太子

自定邊至寧夏沿路皆沙磧無草鹹蒿鹹刺沙蒿度笈
草之外皆斥鹵地也寧夏附近皆稻田引黃河之水以
布種無事栽插地方水土不甚佳於人不甚相宜想皇
太子欲聞之故爾示知黃河沿岸及邊外草極佳軍中
之馬悉驅而牧之草青馬可飽也康熙三十六年閏三
月初五日

諭皇太子

初七日遣往噶爾丹員外郎博席希來降之格壘沽英杜拉爾之子吳巴什俱至丹卽拉之使察漢代曾遣還今復來至格壘沽英杜拉爾滿濟噶爾丹之使拉麻察卜丹卽拉之使老卜臧等尚未至騰寫詢問伊等之言及噶爾丹之奏疏稍等待之於初十日早滿濟老卜臧來至申時遣往阿喇卜坦丹津汪布筆帖式赫塞策汪札卜王之長史馬尼圖等至喀倫奏報之事大將軍伯

費揚古報聞之事俱至初十日晚格壘沽英杜拉爾拉
麻察卜等來至詢問伊等之言謄寫一併寄去觀噶爾
丹情狀與丹卽拉實不相協今阿喇卜坦丹津汪布又
遵朕命心向我國誠哉彼人心離散困於饑饉也今移
向額黑阿拉爾者以有魚之故耳豈其有從往之人歟
頃來歸之人接踵而至彼之消息絡繹而聞朕心決定
事機而後行斷不輕忽亦無急遽也今轉輸餉糧皆已
籌畫完備征行師旅皆已調度周詳惟待其消息故時

日未定耳糧饟草豆隨營之米粟駱駝騾馬糗糒之屬
皆大有餘竝未苦累官員兵民也書至此朕所遣前鋒
侍衛奇薩穆等擒厄魯特夫婦兩人至奇薩穆等奏言
我等謹遵諭旨指授於三月十九日自寧夏起程閏三
月初一日至古爾班賽漢之地得此厄魯特來還等語
厄魯特人札木蘇口供書於別幅為此諭知可示之諸
臣康熙三十六年閏三月十一日

諭皇太子

二月間朕躬親赴寧夏欲招徠瑚瑚腦爾等西陲厄魯特故將情事宣示遣台吉阿拉布潭得木楚克都統杜斯噶爾商南多爾卽等曾周詳訓諭令之前往其先未知事之成否且恐或至用兵亦未可知故未遣報今觀阿拉布潭等奏章言瑚瑚腦爾台吉等俱已歸順將欲趨赴行在矣兵革未嘗一試而西陲之厄魯特盡皆收服大喜慶之事故速報之策汪拉布灘已屬於我阿喇卜坦丹津汪布已遣使至亦屬於我朕在此喜悅烜赫

不待言矣惟旦夕之間將噶爾丹或戮而送至或擒而送至朕坐以待之耳為此降諭令議政諸臣看閱於皇太后前奏聞宮中咸令知之阿拉布譚等奏章及詢問厄魯特阿喇卜坦來人之言謄寫並發康熙三十六年閏三月十三日

諭皇太子

朕經理軍務完備於十五日向白塔啓行所經理諸務俱詳悉謄寫發往白塔乃黃河灣曲之地鄂爾多斯杜

稜公之哨口此書到後奏報不必由邊內遣發令出沙
虎口於邊外遣來可近千里而路亦易行邊內之地險
惡不可勝言當雨水溽暑之時人中熱而馬倒斃者必
多寧夏之地為瀚海之中年老及體弱之人不甚相宜
雖無病人而腹中不調顏貌瘦損者往往有之在我衆
則全不覺也寧夏距賀蘭山之邊百餘里水草之佳不
必言朕隨行諸臣侍衛護軍執事人之馬及御廄之馬
駝牛羊俱於察罕拖會地方牧放此二十日內俱略覺

肥壯未嘗於地方取一束草一勺豆以為飼養之用故
米豆芻茭存剩甚多諸路運送俱著停止卽於所至之
地各處存貯朕此番遠行專為籌畫糧餉酌定軍旅進
止機宜而來其可為勞苦百姓煩擾地方之事乎今事
務完備故詳悉書寫特示可以此與議政諸臣看之康
熙三十六年閏三月十五日

諭皇太子

朕躬安善皇太子佳否朕沿黃河而行見其地甚佳草

亦甚茂薪樵足用渣克木檉柳杞柳阿爾塔哈爾哈納
蒙奎哈爾哈納等物皆有之黃河之曲其林數處則有
大鹿野豕平曠處則有黃羊之類雉兔有而不多因行
兵不事圍獵於洲渚間乘舟以往略張步圍耳米穀俱
以船載至白塔從白塔地方朕親視陸運使人人皆如
朕奮勉事當可成矣俟至白塔後遣內使於

皇太后前請安此報於二十三日四更時至卽於是日
酉時遣回康熙三十六年閏三月二十三日

諭皇太子

朕躬安善皇太子佳否朕自白塔行二十五里駐蹕於二十九日親閱前鋒軍士及黑龍江兵啓行初一日親閱烏鎗兵綠旗兵啓行糧餉悉由水路於黃河順流運載除前沿路所食之糧不計自初一日始計足四閱月之糧給之前往馬駝肥健軍容嚴整朕駐蹕之地以繩度之去兩狼山一百二十里沿路無水漢人名兩狼山蒙古呼為哈爾哈納於是集軍中駱駝於于成龍未至

之前運送糧餉過此無水之地待此運載駱駝還至之後朕卽旋師前伏暑而還自京師乘來馬及前所遣馬皆肥駱駝亦佳有言由水路行八九日可至湖灘河朔其負載馬駝不能前赴由陸行可得二十日待起行之時再為報之康熙三十六年四月初一日

諭皇太子

朕躬安善皇太子佳否朕所籌畫軍務皆已完備運送糧米於狼居胥山駱駝皆無恙載到於初五日還初六

日駐宿一日令馬駝渡河擬定軍衆由陸路遣發朕於
水路啓行櫻桃進到朕以果實繁懷如此朔漠窮荒何
事三度親臨耶自後毋送康熙三十六年四月初二日
諭皇太子

朕於初七日已由水路行黃河多曲岸則泥濘居人稀
少應官之馬不可得凡奏疏俱令前赴木納河朔以待
其師衆仍由陸路而往留內大臣索額圖於白塔地方
付以烏鎗兵二百名各旗馬一千四百餘匹朕軍中所

攜餘米八百石如去年留尚書班第以備接濟回旋兵
丁人役商旅也委任明白朕始啓行初謂四日可至木
納不意日來多風波濤甚大程期稽緩十四之夜朕前
經過時所見之額爾得尼班第達胡圖克圖遣人來告
云今日薄暮有一小船言欲奏聞噶爾丹已死丹卽拉俱
歸降之事極為緊要情形甚是急速是以我之胡圖克
圖以此喜音令我馳騎而來奏知皇帝朕因連夜令人
覓馬由黃河兩岸前迎又以小舟逆流迓之十五日辰

時散秩大臣布克韜至奏云上以小舟留於內大臣索額圖處曾諭以朕往木納之際若有緊要事情馬難驟至則令乘此小舟速赴行在今緊要喜慶之大事無有過於此者故著臣等星夜趲程臣等兩日夜至此齎有大將軍伯費揚古奏章等語今將大將軍伯費揚古奏章謄寫遣發外其噶爾丹首級令速致之一到迅送京師朕三次遠臨絕塞者以此賊不可一日姑容之故也所見若不明決豈肯貽笑後人而為此舉乎茲賴

天 地

宗社之福諸厄魯特皆已收服蒙古諸國靡有一不來
臣者俟噶爾丹首級解至京師時可傳集諸王貝勒貝
子公滿漢大臣官員明告此故令會議覆奏送來朕心
不勝喜悅持筆不能成文匆匆發諭康熙三十六年四
月十五日

諭皇太子

朕躬安善皇太子佳否汝皇父薄德何意如此福慶凡
所至之地指畫之事無不脗合此皆

天

地

祖

宗之眷祐也今此普天率土寇敵之言再不聞於耳矣
朕懷抱已愜讐忿盡洩皇太子踴躍歡忭更當何如康
熙三十六年四月十五日

諭皇太子

朕順黃河之流行十日尚未至木納水甚險而舟行可畏不可輕忽視之前曾詢問言四日可抵木納故令凡所奏報俱於木納等候今以舟行遲緩故遣司官從木納迎來於十六日至行在其遲緩之故以此又沿河一帶捕牲之處甚多洲渚間鹿豕與雉皆有之河內魚雖不多而亦不致缺乏雁鴻甚多河套之內乃鄂爾多斯之地河之北乃喀爾喀之地再偏東則烏拉特之地烏

拉特生計甚饒牛羊充裕兩岸老幼男女擁塞稽首以
此亦略擔遲因慶賀殄滅噶爾丹進獻駝馬牛羊者無
數舟行時皆未收納惟以我軍所捕之物令彼飽餐而
遣之蒙古等懷德畏威至於已極朕今惟致噶爾丹首
級振旅京師長享太平為急務耳康熙三十六年四月
十七日

諭皇太子

朕躬安善皇太子佳否十八日過木納七起爾寨桑來

問彼之詞抄錄寄去外朕面加細問噶爾丹之死飲藥
自殺信然矣或衆謀而毒以藥抑自飲藥俟車木卜臧
卜來時從容問明可耳朕大事已畢意殊寬適日與諸
臣每一語及輒一為欣忭噶爾丹之屍聞已焚之矣然
雖復完具亦不過一枯朽頭顱耳先是吳三桂屍亦焚
致其骨糜爛之於刑人之市而棄之其往例甚昭然也
康熙二十六年四月二十日

諭皇太子

朕過湖灘河朔於三十日經沙虎口往張家口從邊內

往則天氣暑熱而又當禾苗盛長之時邊外近而且涼

今歲水草甚佳我軍之馬駝雖征行四閱月正值青草

茂生無論貧富咸皆整飭一無所損失朕多方區畫必

令全致之約略五月中旬可至京師京師之馬一無所

需用此諭到後一切奏報皆從張家口遣奏御用茶湯

冰水俱出張家口從驛遞來迎時當乳酥饒足蒙古等

來迎者充塞於道食物亦多不必攜來迎接此等事俱

奏聞

皇太后并宮中咸令知之康熙三十六年四月三十日


諭皇太子

朕以去歲赴歸化城之路稍為紆曲故於驤藍驤紅正紅三旗察哈爾地方之中取路而歸蒙古生計殷實且時候正佳殊覺饒裕因減噶爾丹爭來稱賀擁塞道路兩旁之山有麇間有別獸今以麇一隻乳酥諸物二函黃花采一筐進

皇太后其宮中亦如此發往又與皇太子廐一隻邊內
暑熱至京佳否不可知因朕遠行日久聊見縈念不在
物耳朕於十五日前必至京師為此特諭康熙三十六
年五月初二日



聖祖仁皇帝御製文第二集卷二十四



總校官庶吉士臣侍朝

校對官檢討臣郭寅

謄錄監生臣張霽

欽定四庫全書薈要

集部

聖祖仁皇帝御製文二集卷二十

五十六

詳校官原任編修臣徐立綱

欽定四庫全書薈要

聖祖仁皇帝御製文第二集卷二十五目錄

北征勅諭

諭領侍衛內大臣國舅佟國維內大臣福善蘇
爾達大學士伊桑阿阿蘭泰

諭大學士伊桑阿阿蘭泰學士宋柱陶岱齊璣
綏色三寶

諭大學士伊桑阿阿蘭泰學士宋柱陶岱齊璣



綏色三寶

諭內閣

諭勇略將軍趙良棟

諭領侍衛內大臣伯費揚古

諭太子少保振武將軍左都督孫思克

諭揚威將軍覺羅恕書

諭都察院左都御史于成龍兵部督捕右侍郎

李鈔通政使司左通政喀拜

諭兵部督捕右侍郎王國昌大理寺卿喻成龍

光祿寺卿辛保內閣侍讀學士范承烈

諭總統督理中路運務左都御史于成龍等

諭大將軍伯費揚古

諭禮兵二部

諭大將伯費揚古

諭大學士伊桑阿阿蘭泰

諭大將軍伯費揚古

諭大將軍伯費揚古

諭大將軍伯費揚古

諭大將軍伯費揚古

欽定四庫全書薈要卷一萬三千五十三

集部

聖祖仁皇帝御製文第二集卷二十五

北征勅諭

諭領侍衛內大臣國舅佟國維內大臣福善蘇爾
達大學士伊桑阿阿蘭泰

我國家自用兵以來所向無敵野戰則盡殲攻城則必
克惟以弓矢戈矛摧堅破強無有不勝後三逆反叛南
方稻田中盜賊皆挾火器抵迎所遇之敵罔有不敗此

朕所深知者後有特設火器修整火礮烏鎗給散八旗
從此我朝聲名威武震懾四方更可知矣今噶爾丹出
沒無常寇掠喀爾喀疆界務期一舉殄滅用是儲備諸
路糧餉整頓六軍器械殫慮籌畫相厥機宜夫此一軍
興也非他役之可比爾官弁兵丁以下廝養卒以上其
各竭力奮勉不遇敵則已若與敵遇功成凱旋當錫以
殊恩用旌勞勩其陣亡者照常給以身價外若護軍與
一子七品職若甲兵與八品職食俸若無子者其所食

錢糧卽給寡婦養之終身所借官庫銀兩亦當予以寬
卹儻違軍法勿冀縱宥必遵

太祖

太宗

世祖皇帝舊制治罪其徧行宣諭使明知之康熙三十
四年十一月二十二日

諭大學士伊桑阿阿蘭泰學士宋柱陶岱齊穡綏

色三寶

屆師出時宣化府古北口綠旗兵卒其加恩賚焉康熙三十四年十二月二十一日

諭大學士伊桑阿阿蘭泰學士宋柱陶岱齊穡綏色三寶

直隸山東河南三省行車兵卒到日訓練之令與運糧官員相習康熙三十四年十二月二十一日

諭內閣

朕思察哈爾之兵若不善飼馬匹恐不能同大軍前進

今宜簡察哈爾兵之健者左四旗可八百人右四旗可八百人左四旗察哈爾八百人令屬之中路每人馬三匹統計馬二千四百匹可屯宣化府以飼養官馬草料分飼之右四旗察哈爾八百人令屬之西路每人馬三匹統計馬二千四百匹可屯大同府亦分給草料飼之如此則六師進發不致逗留大學士等會同兵部理藩院議以聞康熙三十四年十二月二十七日

諭勇略將軍趙良棟

比年以來噶爾丹怙惡跳梁侵凌喀爾喀諸部落朕視
遠邇中外為一體不忍聽其擾害藩服也今聞其竄伏
於巴顏烏闌地方去京師二千里去四十八固山邊境
七百餘里自秋徂冬馬畜疲瘦形迹狼狽正宜及此時
翦滅之以永弭邊患爾久著績行間性秉忠義練達機
宜故茲馳諭與爾商略爾體中稍可勉力支持即趨赴
闕廷以共悉心籌畫爾宜深體朕意并賜長白山上用
人參以資頤養特諭康熙三十五年正月十六日

諭領侍衛內大臣伯費揚古

今厄魯特噶爾丹毀蔑盟誓傷我使者搶掠喀爾喀人等又阻尼班禪胡圖克圖之來陰蓄狡謀違旨妄行剿滅不容少緩用是遣發各路大兵聲罪致討特命爾為撫遠大將軍統領西路大兵一切事宜爾與都統伊勒慎護軍統領宗室費揚古護軍統領瓦爾達副都統碩代理藩院侍郎滿丕等公同計議而行勿謂自知而不納衆論勿當事會而致失機宜勿恃兵強而輕視逆寇

嚴偵遠探聞或疎虞其統領蒙古兵丁前來之王貝勒
扎薩克台吉與綠旗總兵官等共相商確酌量行事爾
仍總統調遣有能擒斬噶爾丹來歸者分別具奏有情
急來歸者務加意撫恤副朕勦亂靖逆之懷官兵或臨
陣退縮貽誤軍機爾會同商議官負以下即以軍法從
事示衆官兵犯小過者會同商酌徑行處治勿泯沒官
兵功績勿寬縱違犯法紀之人賞罪之際務極嚴明如
有用運米綠旗官兵與情願効力人負之處爾即酌量

調遣爾等將厄魯特殲剿廓清安靖邊圉斯稱委任爾等宜殫竭心力早奏膚功欽哉故諭康熙三十五年正月二十五日

諭太子少保振武將軍左都督孫思克

今厄魯特噶爾丹毀蔑盟誓傷我使者搶掠喀爾喀人等又阻尼班禪胡圖克圖之來陰蓄狡謀違旨妄行剿滅不容少緩用是遣發各路大兵聲罪致討特命爾統領綠旗官兵一切事宜爾與將軍博濟一等侍衛副都

統阿南達副都統西爾哈達巴麟祖良弼馬自德等公
同計議而行揚威將軍覺羅恕書亦統領滿洲官兵同
爾前進爾二人皆國家大臣膺朕委用重任之人凡關
軍機重情俱宜體朕委用之意同心竭力協謀舉行勿
分爾我各執己見互爭優劣以致因私害公負朕倚任
至意勿謂自知而不納衆論勿當事會而致失機宜勿
恃兵強而輕視逆寇嚴偵遠探罔或疎虞與綠旗總兵
官等共相商確酌量行事爾仍總統調遣有能擒斬噶

爾丹來歸者分別具奏有情急來歸者務加意撫恤副
朕戡亂靖逆之懷官兵或臨陣退縮貽誤軍機爾會同
商議官負以下即以軍法從事示衆官兵犯小過者會
同商酌徑行處治勿泯沒官兵功績勿寬縱違犯法紀
之人賞罰之際務極嚴明爾等將厄魯特殲剿廓清安
靖邊圉斯稱委任爾等宜殫竭心力早奏膚功欽哉故
諭康熙三十五年正月二十五日

諭揚威將軍覺羅恕書

令厄魯特噶爾丹毀蔑盟誓傷我使者搶掠喀爾喀人等又阻尼班禪胡圖克圖之來陰蓄狡謀違旨妄行剿滅不容少緩用是遣發各路大兵聲罪致討特命爾統領滿洲大兵一切事宜爾與將軍博濟一等侍衛副都統阿南達副都統西爾哈達巴麟祖良弼馬自德等公同計議而行振武將軍孫思克亦統領綠旗官兵同爾前進爾二人皆國家大臣膺朕委用重任之人凡關軍機重情俱宜體朕委用之意同心竭力協謀舉行勿分

爾我各執已見互爭優劣以致因私害公負朕倚任至
意勿謂自知而不納衆論勿當事會而致失機宜勿恃
兵強而輕視逆寇嚴偵遠探罔或疎虞與綠旗總兵官
等共相商確酌量行事爾仍總統調遣有能擒斬噶爾
丹來歸者分別具奏有情急來歸者務加意撫恤副朕
戡亂靖逆之懷官兵或臨陣退縮貽誤軍機爾會同商
議官員以下即以軍法從事示衆官兵犯小過者會同
商酌徑行處治勿泯沒官兵功績勿寬縱違犯法紀之

人賞罰之際務極嚴明爾等將厄魯特殲剿廓清安靖
邊圉斯稱委任爾等宜殫竭心力早奏膚功欽哉故諭
康熙三十五年正月二十五日

諭都察院左都御史于成龍兵部督捕右侍郎李
鈞通政使司左通政喀拜

今厄魯特噶爾丹毀蔑盟誓傷我使者搶掠喀爾喀人
等又阻尼班禪胡圖克圖之來陰蓄狡謀違旨妄行用
是遣發各路大兵聲罪致討進剿大兵所需糧米浩繁

督運職任重大必須專委大臣統理今特命爾于成龍
李鈔喀拜總理運送中路大兵軍米事務爾等督運之
米務隨大兵運到勿得遲延有誤軍需駐劄之處必安
營壘令兵丁加意尋防所派副都統總兵官部院官負
以及爾等題帶文武各官俱酌量派定分委押運其情
願効力人負亦量行分派隨押車輛俟到邊外如有用
蒙古兵處即將爾等經過相近地方所有蒙古兵丁酌
量調用有貽誤修路搭橋者即行指名題參凡關運米

事情各部院不得掣肘爾等總理運務亦須熟計征戰事宜將官兵不時操練務使賞罰嚴明其勅中開載未盡事宜爾等即會同商酌而行儻遇有征戰之處與副都統盧崇耀總兵官岳昇龍劉國興等商計而行有於運米事情勤勞供職者即彙題獎勸如有怠玩厥職不効力勤勞者即行參奏懲治或官負或趕車兵役偷盜米糧馬匹及妄作非為者即以軍法從事示衆爾等膺茲重寄務須殫竭心志黽勉効力將米運至軍前以濟

軍需斯克副朕委任之職如或因循怠忽措置乖方致誤職任責有攸歸爾等慎之故諭康熙三十五年正月二十六日

諭兵部督捕右侍郎王國昌大理寺卿喻成龍光祿寺卿辛保內閣侍讀學士范承烈

今厄魯特噶爾丹毀蔑盟誓傷我使者搶掠喀爾喀人等又阻尼班禪胡圖克圖之來陰蓄狡謀違旨妄行用是遣發各路大兵聲罪致討進剿大兵所需糧米浩繁

督運責任重大必須專委大臣統理今特命爾王國昌
喻成龍辛保范承烈總理運送西路大兵軍米事務爾
等督運之米務隨大兵運到勿得遲延有誤軍需駐劄
之處必安營壘令兵丁加意巡防所派總兵官部院官
員以及爾等題帶文武各官俱酌量派定分委押運其
情願効力人員亦量行分派隨押車輛俟到邊外如有
用蒙古兵之處即將爾等經過相近地方所有蒙古兵
丁酌量調用爾等總理運務亦須熟計征戰事宜將官

兵不時操練務使賞罰嚴明其勅中開載未盡事宜爾等即會同商酌而行儻遇有征戰之處與總兵官毛來鳳許靖國等商計而行仍聽撫遠大將軍節制有於運米事情勤勞供職者即彙題獎勸如有怠玩厥職不効力勤勞者即行叅奏懲治或官員或趕車兵役偷盜米糧馬匹及妄作非為者即同大將軍會議以軍法從事爾等膺茲重寄務須殫竭心志黽勉効力將米運至軍前以濟軍需斯克副朕委任之職如或因循怠忽措置

乖方致誤職任責有攸歸爾等慎之故諭康熙三十五年正月二十六日

諭總統督理中路運務左都御史于成龍等

大師討寇全資兵力內外滿洲漢軍綠旗諸路從征兵丁俱已各加恩賚其外省調集步兵輓運軍糧載塗况瘁尤可軫念所有每月應支銀米本營照常支給俾贍養家口仍各給與行糧以為道路之資所運米石如悉依期輓至克濟軍需不致虧損遲誤俟大兵凱旋准補

入馬兵營伍用彰獎勸有効力勤敏才堪拔擢者爾等
可記名彙奏以俟酌用兵丁勞苦饑寒凡督運大臣官
負宜時加拊循慰勉庶人爭自効踴躍赴功西路輓運
兵丁亦照此例行爾等可移文各該巡撫通行傳諭示
朕體恤軍士至意特諭康熙三十五年正月二十七日
諭大將軍伯費揚古

大兵進剿朕與議政大臣所議者已遣書諭汝外今聞
根敦代青貝勒進至洪俄賴之內七斯希布地方汝等

二路兵恐將喀爾喀誤以為厄魯特此事至要宜向阿
南達切實曉諭之又汝等過翁金後將好鄉導給與商
南多爾即從何地相通約定日期遣至朕軍前為善此
二事雖無大關係思慮所及因交與阿第令諭知之康
熙三十五年二月十六日

諭禮兵二部

朕統御中外念切撫綏惟務休養民生未嘗遠事征討
比年以來海宇昇平閭閻樂業四方固已無事獨厄魯

特噶爾丹荒裔狡寇肆逞凶頑自烏瀾布通敗遁之後
不自悔禍仍行狂逞悖

天虐衆違蔑誓言侵掠我臣服之喀爾喀潛入巴顏烏
喇之地詭謀叵測逆狀已彰乘其竄伏近邊自應及時
撲剿儻目今不行翦滅恐致異日沿邊防戍益累兵民
聲罪迅討事不容已用是遣發各路大兵分道竝進朕
特躬蒞邊外相機行事以衆擊寡以正誅逆天意人謀
無不允協此寇一殄則邊塵蕩滌疆圉輯寧內安外攘

實在茲舉告祭

天

地

宗廟

社稷並一切應行事宜著察例詳議具奏爾二部即遵諭行特諭康熙三十五年二月十八日

諭大將軍伯費揚古

覽總兵官康調元所奏有山西巡撫所助騾匹米石俱

未到等語朕觀此或因大兵起程日期改近稍有措辦
未及亦未可定糧餉牲畜所關最重前後之間將軍宜
審顧萬全汝等所由道遠運送糧餉較中路其難數倍
萬一糧餉不能陸續運至汝等兩路之兵恐致匱乏此
事朕心深切憂慮特手諭急速馳示康熙三十五年二
月二十三日

諭大學士伊桑阿阿蘭泰

諸皇子雖精嫺騎射然於戎事未曾閱歷即諸王之中

未經身親軍務者亦多也部院大臣皆屬供職年久諳練政務故朕特加選擇調旗分置於諸皇子及王等軍中凡嚴肅營伍禁戢士卒諸務皆令其與諸皇子王等商畫從事戰陣之時亦相隨佐理諸皇子及王等如有過失即為面諍毋得瞻徇言若不聽則奏聞於朕儻不仰體朕委任之意凡壁壘不整軍旅無紀皇子及王等或有過失瞻徇顧畏罔克匡正於朕前又不行舉奏則朕必按軍法治罪決不寬宥可傳諭諸臣康熙三十五

年二月二十七日

諭大將軍伯費揚古

副都統阿玉璽等到於大兵駐劄南口之日聞其鑿井
易成不勝喜悅汝等領兵至喀倫報聞之時將汝至翁
金之日約略定期奏聞又將到土喇日期詢問喀爾喀
好鄉導以地名與日期約略議定奏聞朕所統之兵行
走駐劄皆因西路兵之故量寬時日為此特諭知之康
熙三十五年三月初一日

諭大將軍伯費揚古

汝至喀倫算至翁金土喇日期奏疏於駐蹕揆宿三月十九日早到汝等奏稱至土喇在四月二十四日朕所統之兵因雨雪稍阻兼以趲候重車雖急速前行於二十四日之先斷不能至土喇汝所領兵於三月十六日之雨或有遲阻將日期另行開除具奏若無所遲阻至翁金奏聞之時亦另行明白具奏汝軍中馬匹何如運米車輛已至何處得寧夏兵消息否此等情形每具疏

時必行奏聞正月二十八日奔來喀爾喀之逃人言噶爾丹在土喇河上流為此特諭康熙三十五年三月十九日

諭大將軍伯費揚古

朕所統之兵近喀倫地方曾遣參領車克楚前鋒侍衛奇薩穆於克魯倫一帶地方踰尋蹤跡偵探消息四月十二日車克楚等至奏云臣等初九日至伊渣爾厄爾幾納地方觀看其形迹自彼處回行於初十日遇沙

津王所遣俄七爾等十五人伊等云噶爾丹於是月初
從土喇向克魯倫移營第三日將我等遣回噶爾丹在
達爾罕敖喇山等語由是觀之噶爾丹與朕所統之兵
相近矣此賊乃狡詐叵測之人潰遁時未必回奔土喇
必渡克魯倫河或自俄濃巴爾即奔塞稜格地方或繞
巴顏烏闌之後詭遁汝兩路之兵知其順克魯倫而下
若隨之而往落空亦未可定朕為此深切憂慮特專遣
人汝大將軍費揚古將彼處地方凡賊可以脫逃之路

周詳詢問加意堵截勿以其順下流而來遂輕視之為此特諭康熙三十五年四月十三日

諭大將軍伯費揚古

汝初七日奏疏以二十一日酉時到覽奏五月初三日可至土喇等語汝等原奏稱二十三日至土喇二十七日至巴顏烏蘭朕所統之兵水草皆得無誤故擬定二十五日至克魯倫河今遣發前鋒已觀其形迹得其活口噶爾丹有向克魯倫下流情狀距朕五日之程此其

間汝宜累次遣人來奏則朕易於相待因汝等久未奏聞不知已至何處恐等待日期遲誤急速前進遂甚在汝等之先令等待與前進兩端皆屬機要事關重大汝等作何行走宜速報聞兩路之兵有先到數日者必相待而行原有成約朕茲相待而行儻不得已師期所關至大則相機而行為此特諭康熙三十五年四月二十二日

聖祖仁皇帝御製文第二集卷二十五

欽定四庫全書薈要

聖祖仁皇帝御製文第二集卷二十六目錄

北征勅諭

諭大將軍伯費揚古

諭大將軍伯費揚古

諭大將軍伯費揚古等

諭領侍衛內大臣

諭扈從官員兵丁

諭戶部

諭領侍衛內大臣

諭領侍衛內大臣

諭大將軍伯費揚古

諭領侍衛內大臣

諭領侍衛內大臣

諭領侍衛內大臣

諭內大臣等

諭尚書馬奇

諭大學士阿蘭泰尚書馬奇

諭大學士阿蘭泰尚書馬奇

諭兵部

諭議政大臣

諭領侍衛內大臣

諭尚書馬奇

諭大學士阿蘭泰

諭議政諸臣

諭大學士阿蘭泰

諭大學士阿蘭泰

諭領侍衛內大臣

諭兵部

諭尚書馬奇

諭領侍衛內大臣

諭領侍衛內大臣

諭領侍衛內大臣尚書班第

諭領侍衛內大臣尚書班第

諭大將軍伯費揚古

諭領侍衛內大臣

諭領侍衛內大臣尚書班第

諭領侍衛內大臣班第等

諭大將軍伯費揚古

諭領侍衛內大臣

諭尚書馬奇

諭尚書馬奇

諭領侍衛內大臣班第等

諭議政大臣

諭大學士阿蘭泰

諭領侍衛內大臣馬思哈等

欽定四庫全書薈要卷一萬三千五十四

集部

聖祖仁皇帝御製文第二集卷二十六

北征勅諭

諭大將軍伯費揚古

近日以噶爾丹處來奔之人所言觀之其饑寒困感至於已極此大機會也

上天佑助有以賊界我之象矣斯時更不可失汝等宜切切注意曩者朕躬親至克魯倫時汝等大兵若前行

三日至巴顏烏闌相近之地噶爾丹從何得脫商南多爾即來後若將所至地方一經奏聞朕所遣殷渣納額林秦等於十三日之前若到朕何故旋師以汝等之兵斷然難至皆困於饑餒故以朕營米糧為轉移之計經理而還然至於賊衆多致免脫來降者又復逃回朕實不意其如此今思此等情事追悔不可勝言汝等兩大將軍會合時中路之兵馬皆肥壯理應挑選軍士通融馬匹即行追逐其潰散之衆俱行收集而來彼時雖至

潰散因無收納者零星會合以致衆多此理之必然者
今汝等作何商議噶爾丹何所底止朕因相距遼遠切
欲聞之特書手勅以諭康熙三十五年九月初三日

諭大將軍伯費揚古

汝遣本錫齎奏九月十二日至已洞悉情事茲丹即拉
雖云投降而噶爾丹之言於今未至然彼雖不投降破
敗已極果其來降大將軍可善言慰導令至歸化城其
時相與籌度措置特易耳彼所遣使若送至朕所朕

措處良難不得不諭令歸降彼若遵旨來降將不復更有所議矣今自丹即拉以下凡所遣人至奏聞送至朕所噶爾丹若遣使來汝即以言覆之我乃大將軍凡事皆我專任我主亦不拂我言今爾等馳奏而返時愈寒冽汝之來人致盡凍斃汝可即歸令噶爾丹來降其時我為汝奏懇於是賞其來使慰以善言遣之即還此等情事一面奏聞一面更加周防其周防事宜馬最為要朕在軍中見我軍之勇健無可訾議而於防護馬匹最

覺疎虞萬一詐稱投降夤夜乘我不備驅馬以出所繫
匪輕汝諳練行間事多閱歷聊以朕意念所及書以諭
焉聞噶爾丹信息以在京豫養之馬軍士騎乘朕躬以
九月十九日起程前往歸化城此際常須奏聞情勢為
佳朕心喜欲亟聞彼中實音為此特諭康熙三十五年
九月十六日

諭大將軍伯費揚古等

汝所奏翁金守護米石副都統祖良弼之事此本於九

月十九日早至朕所前五月十三日我兵擊賊以後為西路善後事宜降有諭旨及該部文移俱在檔案朕何庸再言經數月而未行掣回者何故朕遣將軍舒恕侍郎滿丕者又何故汝之此行更為何事朕殊不解朕在京師事惟獨斷西路之事未全善慮未周詳即逐件言之衆意亦未必以為然今悉如朕所言矣噶爾丹困蹙已極旦夕之間將寒凍以死其頭目遣人來以為此大機會故爾喜悅令相戰則來降之人將懼而中止又得

帳房金鬻此事朕以未得掣回之故深以為憾又奏章
內將翁金所有兵丁若干官負為誰器械何如戰時久
暫若何何以退却此撥什庫兵丁何以奔來俱未詳載
朕相距遙遠不勝憤懣嗣後凡奏事必將始末詳具為
善特諭康熙三十五年九月十九日

諭領侍衛內大臣

大同宣化府積貯草豆甚多騎官馬之新滿洲護軍三
百名內令二百十名騎達卜孫腦兒馬羣之馬隨往前

去其九十名將伊等所騎官馬九百匹赴大同府餵養
大臣侍衛官負不騎官馬者亦照職掌定額令留馬於
大同府三旗各派大臣一員及侍衛三員經理飼秣其
前行兩起大兵亦令赴大同府餵養馬匹如此則於程
途無阻於軍事有益矣俟下營後議奏康熙三十五年
九月二十日

諭扈從官員兵丁

朕行甚緩無急迫處各騎士皆善加調適以行下至僕

役俱以此通行嚴飭曉諭康熙三十五年九月二十日

諭戶部

宣化府錢糧前已屢經蠲免但比年以來所屬各州縣
牧養軍前需用馬匹又大兵絡繹往來雖各有支給經
費而供億甚繁殊勞民力朕巡幸經臨深切軫念著將
康熙三十六年宣化府屬地丁銀米全與蠲豁仍行文
該撫通行曉諭俾民間均霑實惠以副朕寬恤黎元至
意爾部即遵諭行特諭康熙三十五年九月二十三日

諭領侍衛內大臣

凡肥壯馬匹則拴至天曉若五六分廐之馬則拴至三更時可將此通諭衆人知之康熙三十五年九月二十三日

諭領侍衛內大臣

朕見餵馬之草皆被踐踏馬宜於夜間拴至當餵之時少少添草餵之為何徒然令其作踐可傳諭諸臣並曉示衆人知之康熙三十五年九月二十三日

諭大將軍伯費揚古

汝報副都統祖良弼擊敗厄魯特奏書二十四日之晨
至於沙城朕覽之不勝欣喜勿謂我師擊敗賊衆彼即
全軍得脫噶爾丹但無所掠獲則彼奔潰離散之外更
有何計將軍惟事招徠切為要圖務使潰散以盡其餘
所下敕諭及招降事宜已令本錫等傳旨茲不再及惟
以善言慰導致彼來歸再為籌度為此特諭朕躬甚安
佳怡悅在途汝安善否康熙三十五年九月二十四日

諭領侍衛內大臣

騎乘官馬侍衛三旗護軍內府執事人員各所乘馬若
記得旗分佐領將原旗分佐領原騎乘人名書於木牌
繫之馬項若記不得旗分佐領各書其人之名繫之著
通行傳諭康熙三十五年九月二十四日

諭領侍衛內大臣

朕日出後始行亦不甚早當於未啓行之前先撤帳房
朕行時即隨後同行則途中既便而於馬畜有益觀此

番軍中帳房不於未行之前豫撤朕遣人催促而後撤
付馱載者甚多朕行時始結束追趕而前晝日既短在
後之人何時可到馬畜亦甚至勞苦今每日行不過三
四十里又非暑熱之時僕役可以照常步行如此則於
馬匹大有裨益可傳諭諸臣并曉示衆人知之康熙三
十五年九月二十六日

諭領侍衛內大臣

令已出邊外騎來馬匹肥者拴至五鼓始可牧放臆歉

者少歇息之汗乾即可牧放康熙三十五年九月二十
八日

諭內大臣等

來降之厄魯特云噶爾丹於波羅吳納罕空金渣巴罕
等處過冬令丹即拉來波羅吳納罕之地相尋波羅吳
納罕者向來渣薩克圖汗所居之地問其地之所在則
距喀倫有四十餘日之程令大將軍伯費揚古進兵右
衛兵每人乘馬一匹騾驢負載前往亦且瘦弱朕度其

斷不能至噶爾丹所居之地必於翁金一帶地方以馬
瘦而返至翁金而返則兵力徒勞而無益於事朕令於
大同牧養馬匹者專為探實噶爾丹所在現今可進則
黑龍江之兵六百人前鋒二百人新滿洲四百人察哈
爾渣薩克之兵挑選千人整齊砲火鳥鎗全給以肥壯
馬駝多帶糧餉令之進剿乘其窮困可以一鼓而殲滅
之矣頃噶爾丹破壞已極我等為何不深籌殄滅之計
而空勞士馬之力乎今速行文大將軍伯費揚古令其

停止進兵若果有機會易於擒獲則勿停止噶爾丹困
感無可往之地儻今冬雖未可行來歲草生之時令馬
匹肥壯整備駱駝噶爾丹任其所之必搜尋其地而剿
滅之此際將降來厄魯特之人接踵差遣招降厄魯特
最為要務惟事招降足令彼勢全潰爾等會議即於今
晚具奏康熙三十五年九月二十九日

諭尚書馬奇

大將軍費揚古所領兵士甚為勞苦食用必至缺少欲

將朕所用牲口發去道路遼遠牲既瘠瘦且須時日可遣人到尚書班第取沙虎口大同等處現存銀五千兩遣官一員送至大將軍費揚古酌量買皮襖牛羊等物給與軍士康熙三十五年十月初一日

諭大學士阿蘭泰尚書馬奇

今歲歸化城一帶年穀豐收而價值亦賤至歸化城時隨行之人所給十日口糧可折價與之令彼各自市買其歸化城之米所以備軍需也此地米穀餘剩則右衛

之兵儻有徵發取路甚便以之給散大有裨益爾等議
奏康熙三十五年十月十一日

諭大學士阿蘭泰尚書馬奇

黑龍江之兵出師日久據將軍奏稱所食口糧可至十
一月初五日朕至歸化城時應將察哈爾兵五百名新
滿洲一百名給足口糧馬匹遣往更代著議奏康熙三
十五年十月十一日

諭兵部

朕至歸化城之日自張家口至歸化城所有常設驛站
外中途添設之驛俱撤回至沙虎口一路以兵部隨行
之馬添設驛站康熙三十五年十月十一日

諭議政大臣

士卒十日猶可不支口糧儻駐扎日久豈可不行支給
且歸化城附近地方牧草維艱應將多餘人役瘦弱馬
匹酌量遣往大同右衛等處飼養等候或遣黑龍江兵
一百名或留此兵於新滿洲兵內遣往著會議具奏康

熙三十五年十月十二日

諭領侍衛內大臣

歸化城貿易人多僕役諸人恐有妄行搶奪著副都統
阿第將土墨特蒙古亦宜嚴行禁止諸臣侍衛執事人
員及軍士馬畜毋得偷竊可諭衆知之康熙三十五年
十月十三日

諭尚書馬奇

朕見歸化城馬駝多而價亦平官員侍衛兵丁人等有

欲借銀兩通融購買馬駝者奏聞給與銀兩先是騎官馬新滿洲不准借給銀兩今如有借者亦准給與康熙三十五年十月十三日

諭大學士阿蘭泰

右衛官負兵丁自駐防右衛以來屢經出兵甚為勞苦朕心殊切軫念著爾前去將官負兵丁所借官庫銀兩扣除俸祿錢糧俱暫行停止其有陣亡官負兵丁人役俱著詳察即給與身價現今給賞則於官兵生計大有

裨益可同學士一人酌帶司官馳驛前往將諭旨通行
曉示康熙三十五年十月十四日

諭議政諸臣

頃將軍費揚古奏稱黑龍江官兵所給五十日口糧於
九月初五日期滿故將喀倫所有米石算至十一月初
五日給與兩月之糧除截留一千石外餘米俱賞給蒙
古所留米千石俱給與官兵喀倫現在無米等語原令
將喀倫所有米石給與兵丁儘其足用其所餘者始給

與七旗蒙古今遽爾給散為時太早而非策矣可行文
將軍費揚古又派察哈爾兵五百人令內大臣吳巴什
領之給以二月餼糧前赴大將軍費揚古處此兵到時
將黑龍江兵內視其人材壯健而馬匹肥者選百人留
之官負亦酌量兵數存留於解送銀五千兩內酌量支
取於所留兵百人亦照察哈爾兵兩月餼糧之數給與
餘兵俱著發回康熙三十五年十月十六日

諭大學士阿蘭泰

右衛官負兵丁甚為勞苦滿洲蒙古漢軍官負兵丁所借官庫銀兩俱著豁免漢軍扣還之例向來不同自奉諭旨以後漢軍所借銀兩照常扣還陣亡者已給身價外其有在軍前病故官負兵丁人役及受傷官負兵丁人役等按所察名數照例給賞此係已經查明之事大學士不必前往學士倭倫往彼一一給散倭倫到右衛時集衆宣示諭旨將詳查賞賚之事傳知議政大臣及諸臣并詳悉移咨亦令大將軍知之俟右衛出征兵丁

到時大學士阿蘭泰傳集亦行曉諭康熙三十五年十月二十日

諭大學士阿蘭泰

右衛官兵已經頒賞大同府綠旗官兵亦經屢次隨征勞苦其陣亡及軍前病故與被創之人俱應加恩賞賚著學士倭倫前往大同府詳察一一照例恩恤其無子嗣承受銀兩者向有致祭之例亦察例致祭學士倭倫賞恤事畢隨即前來康熙三十五年十月二十二日

諭領侍衛內大臣

應留大臣一人於歸化城收養來降之厄魯特完聚其
夫妻給以衣服餼糧等務皆令其料理可令內大臣宗
室永吉并乾清門侍衛韓楚哈負外郎董殿邦副都統
阿第公同商酌而行支緞皮襖二百領皮襖一百領銀
三百兩付之有給食物需用之處將此銀三百兩應用
註冊於歸化城之土墨特蒙古勿行徵取厄魯特來降
之人其素有名目者以緞皮襖給之其微賤者以皮襖

給之永吉韓楚哈隨朕至湖灘河朔仍還於歸化城留住安親王到歸化城時王與副都統雅圖留住於歸化城出師日久其隨從之人俱著回京康熙三十五年十月二十三日

諭兵部

將軍薩普蘇病未痊愈不必隨朕前往將伊所帶官員兵丁一百十人率往大同府養馬以待自大將軍伯費揚古處有兵五百人到時亦令往大同府養馬若大將

金史紀事本末 卷二十六
軍處有急務即率伊兵丁六百人前赴大將軍康熙三十五年十月二十三日

諭尚書馬奇

朕念右衛兵丁勞苦遣侍衛馬武以牛羊犒賚之馬武回朕詢知兵丁中步行者甚多食用亦匱乏可每人賞銀三兩即速詳查兵丁名數具奏康熙三十五年十月二十四日

諭領侍衛內大臣

右衛官兵明日可到我軍自出師以來皆談笑優游每日飽食二次來朝止早餐一次其晚時一次不必再食俱持以饗右衛勞苦之兵御膳房兩次飯食及諸皇子兩次飯食亦俱持以饗右衛之兵可將此通行曉諭諸臣執事人負并合營知悉俱各持往其所飲茶亦令茶房預備康熙三十五年十月二十四日

諭領侍衛內大臣

適遇停駐之日自王以下衆人所乘來馬匹皆令查點

有多至數百者亦有少者俱著詳察具奏朕不過欲知其數而已御廄馬亦并查點又衆人所乘馬中有臆力不能行十日者另令查出曾給與衆人所乘官馬及御廄馬并查之我軍路程甚遠此馬馬能行到今右衛無馬之兵令其乘之而往於馬上各繫其主之姓名伊等現有官支草豆即令飼養肥壯若有調發乘此前往回時各給還原主有損亡者朕力可以賠償之康熙三十五年十月二十五日

諭領侍衛內大臣尚書班第

此皆係官馬朕所乘內殿之馬亦有之因右衛軍士無馬以致步行者故令乘之可將此馬與無馬之人通融乘騎馱載前至右衛到右衛後軍士等現有草豆令其飼養肥壯遇有調發則乘之而往若無調發則俟其肥時送往京師此皆官馬一匹亦不可損失康熙三十五年十月二十五日

諭領侍衛內大臣尚書班第

右衛兵丁所借支官庫銀俱已豁免今此兵一到右衛其管轄之人令兵丁急速整備馬匹必致借支官銀措辦如此則兵丁生計又致困苦矣其兵丁備辦馬匹暫停從容購買目前若有調發現有朕行在之兵其給兵丁所騎之馬或送大同飼養或留右衛飼養俱聽從其便兵部即速移文右衛護軍統領康熙三十五年十月二十六日

諭大將軍伯費揚古

聞右衛軍士回即遣侍衛馬武驅牛羊往迎二十四日朕躬親至渾津邨迓之二十五日賜宴湊三日之糧賞給行糧銀各三兩觀軍士甚疲苦見其步行狼狽情狀朕心深為憫惻躬親閱視凡軍士咸以茶飯餅餌酒肉飲食之自諸臣以至軍士歡聲動地前聞調右衛兵朕稔知此兵決難前進雖徒步竭蹶而往亦不能至所指之地故朕以現在飼養馬駝酌量足以制噶爾丹之數率之前來途中聞丹即拉已回朕又將帶來察哈爾兵

五百人給以百日餼糧遣往更換黑龍江之兵朕駐蹕
歸化城十日歸化城米穀一勺未曾支用凡來降之人
再四詳問皆言噶爾丹向哈密去若果往哈密則朕意
以為擒獲益易矣哈密距嘉峪關十二日之程行走亦
易故朕意將所領兵竟赴寧夏朕由寧夏前往有調遣
之處就近可以相機行事必將噶爾丹擒獲誅戮始愜
朕志但朕啓行後噶爾丹及丹即拉等若稱投降而來
爾等兵力單薄而右衛之兵無馬朕慮及於此故遣使

與汝商酌汝等會議具本速行奏聞朕在湖灘河朔待之特諭康熙三十五年十月二十六日

諭領侍衛內大臣

朕日行惟二三十里耳牧羣之馬何故早來此正當飼草之時嗣後稍遲送至并通諭衆人知之康熙三十五年十月二十七日

諭領侍衛內大臣尚書班第

黃河水深飲馬時勿絆其足若有傾跌難於拯救可以

此通諭衆人知之康熙三十五年十月二十八日

諭領侍衛內大臣尚書班第

今年春出征之山陝綠旗兵因軍糧匱乏絡繹遺留在後仍結隊夥明顯回汛此等較之逃回者不同糧米既乏而離將軍又遠遂各尋營汛而還若行議罪情為可憫應將此等從寬免其察議現拏繫獄者俱行釋放著通行曉諭康熙三十五年十月三十日

諭大將軍伯費揚古

汝二十九日覆朕諭旨所奏章疏於初二日晚到閱知
欲調太原駐防兵及巡撫標兵一千名沙虎口前未出
征騎兵五百名朕思太原兵既未諳戎行且前至歸化
城已及千里之遙綠旗兵人惟一馬當此天時嚴寒雖
得遠至力已疲竭緊急之頃責其用命實至僨事今以
朕營火器護軍千人砲火兵二百四十人前鋒兵二百
六十人共足汝所調一千五百之數為汝備之營馬既
肥衣裝亦厚此兵士隨朕出入諳練為優朝有消息夕

可征行朕駐蹕於此噶爾丹確信亟欲聞知其人若有
來降付與最善馳騁者迅赴行在若噶爾丹有來降音
息喀倫外所居喀爾喀不急急移入內地而遽信其來
歸坐誤大事則所繫非淺鮮也頃丹即拉稱降遣使而
反侵我糧情狀昭然可覩矣今不可再誤當益切周防
更為遠慮為此特諭康熙三十五年十一月初四日

諭領侍衛內大臣

草甚叢密營內之火各宜謹慎嚴行禁諭恐於迎風處

失火朕御營有何可慮惟衆人之故耳可以此通行嚴
加曉示康熙三十五年十一月初九日

諭尚書馬奇

與貝勒松拉布同往遣前鋒參領阿祿一等待衛巴爾
楚喀為首領伊等餽糧雖貝勒松拉布給與恐不足食
用亦未可定可將銀百兩付阿祿於不足時湊用康熙
三十五年十一月二十一日

諭尚書馬奇

厄魯特之嘎爾丹多爾濟聞其窘乏從此地賜給銀兩
則道遠馱載維艱主事華善至甘州肅州等處向地方
官取銀一千兩賜與嘎爾丹多爾濟即付來使阿岳持
去其阿岳賞銀三十兩同來二人賞銀二十兩康熙三
十五年十一月二十二日

諭領侍衛內大臣班第等

噶爾丹餘孽欲盡殄滅之西路豫備最為緊要西安調
遣滿洲兵二千人之馬綠旗兵之馬及李學生所送五

千茶馬之外後有繼得之馬遣司負會同巡撫俱於甘肅地方飼養則於軍務實有裨益著會議具奏康熙三十五年十一月二十四日

諭議政大臣

大將軍伯費揚古可減省隨從之人馳驛疾速前來商酌軍機將軍事務暫著舒恕代理可速移文康熙三十五年十一月二十四日

諭大學士阿蘭泰

右衛大同府官負兵丁毋得勞頓馬匹遠道來迎各於所駐城郭之外就近迎接可行文諭之康熙三十五年十二月初四日

諭領侍衛內大臣馬思哈等

此際甚無事朕與將軍費揚古商議噶爾丹若於今冬來降將軍費揚古處現有察哈爾兵五百人黑龍江兵一百人又將右衛烏鎗兵二百人副將黃元烏鎗兵一百人令右衛護軍統領將馬上可載之砲酌量以數位

給之大同府飼養馬匹烏鎗前鋒四百人共兵七百人
著前鋒統領碩鼐率之前赴右衛豫備停妥聽大將軍
調遣碩鼐即率之而進此兵七百人將軍費揚古處所
有兵六百人又調集扎薩克蒙古之兵千人共有二千
餘人兵力不可勝用矣如此則大同所有烏鎗護軍一
千人火器兵二百四十人前鋒四百人黑龍江兵五百
人現今所留護軍二百人槩不調遣令其駐扎養馬於
來歲進剿之時始行調用著伊等會議具奏康熙三十

五年十二月初七日

聖祖仁皇帝御製文第二集卷二十六

總校官庶吉士
校對官檢討
詹錄貢生
臣李

總校官庶吉士臣侍

朝

校對官檢討臣郭

寅

詹錄貢生臣李

炯

欽定四庫全書薈要

集部

聖祖仁皇帝御製文二集卷二十七

八

詳校官原任編修臣徐立綱

欽定四庫全書會要

聖祖仁皇帝御製文第二集卷二十七目錄

北征勅諭

諭議政大臣等及大學士伊桑阿阿蘭泰

諭大學士伊桑阿阿蘭泰

諭議政大臣班第等大學士伊桑阿阿蘭泰

諭大學士伊桑阿阿蘭泰

諭大將軍伯費揚古



諭領侍衛內大臣公福善等

諭領侍衛內大臣

諭理藩院

諭大學士伊桑阿

諭大將軍伯費揚古

諭副都御史努赫

諭大學士伊桑阿

諭大學士伊桑阿

諭領侍衛內大臣索額圖大學士伊桑阿

諭戶部

諭理藩院

諭領侍衛內大臣索額圖等

諭領侍衛內大臣索額圖大學士伊桑阿

諭右衛將軍偏俄山西巡撫倭倫

諭侍郎安布祿

諭大將軍伯費揚古

諭山西巡撫倭倫陝西巡撫黨愛甘肅巡撫郭

洪

諭領侍衛內大臣索額圖

諭領侍衛內大臣及嚮導官

諭領侍衛內大臣

諭山西巡撫倭倫

諭兵部

諭侍郎安布祿

諭員外郎薩哈連

諭議政諸臣

諭大學士伊桑阿

諭大學士伊桑阿等

諭大學士伊桑阿

諭兵部

諭議政諸臣

諭大學士伊桑阿

諭護軍統領托倫等

諭領侍衛內大臣

諭大學士伊桑阿

諭大學士伊桑阿

欽定四庫全書薈要卷一萬三千五十五

集部

聖祖仁皇帝御製文第二集卷二十七

北征勅諭

諭議政大臣等及大學士伊桑阿阿蘭泰

今噶爾丹之勢窮蹙已極若天與不取是坐失機會矣
又格壘沽英杜拉爾寨桑已限以八十日遣去先所遣
吳爾占扎卜之母齊巴哈戚其信亦將可至今不整繕
甲兵預為之備必致有誤茲者出師亦分兩路而進每

一路兵三千二路之兵不必互相期約視其所遇以為進取此次軍旅綠旗之兵多調亦屬無濟惟少發士卒而多攜馬匹其馬匹量給士卒則可與禁軍一同征行矣今茲用兵所需糧米仍如常隨運附近邊疆購買牛羊尚為易得可支用正帑每一路買備牛羊二萬攜去大有裨益至輓運軍儲駱駝最要駝與馬俱應廣備此購買駝馬驢騾牛羊等畜當遣賢能官往肅州寧夏二處採買其具議以聞康熙三十六年正月初三日

諭大學士伊桑阿阿蘭泰

三千軍士伊等盛甲器械釜帳等物所重斤數若干百
日米石之數及所重斤數若干馱載需用牲畜若干至
牛羊二萬可供軍食者幾何時也部院大臣其會同詳
議以聞此次軍士行裝可較去歲春間者酌量稍輕省
之康熙三十六年正月初六日

諭議政大臣班第等大學士伊桑阿阿蘭泰

行兵者以道路為至要朕已召嚮導萬舒克博洛等來

若輩到時遣嚮導親近一等待衛僧圖等同現駐大同之護軍參領車克楚前往寧夏選西安官兵內勇健者百人率領直至古爾班賽漢地方閱視道路計自寧夏而往去來約需四十日伊等於途間或遇噶爾丹之人則生擒之力儻相敵即殺之若與伊拉固克三胡圖克圖相遇亦并擒之康熙三十六年正月初六日

諭大學士伊桑阿阿蘭泰

寧夏地方採買駝馬驢騾牛羊著交西安副都統阿蘭

泰肅州採買著現駐宣化府之侍郎席米圖去皆支正
帑以時直購辦毋得減少其價著選部院賢能司官遣
至阿蘭泰席米圖處會同督撫及地方官監買伊等其
勸諭地方官量所有駝馬驢騾共佐軍興爾大學士等
會同部院大臣將司官中之素有材能而曾奉差遣又
家道不匱乏者選擇引見毋得徇情又大將軍伯費揚
古今若有征行仍率前鋒統領碩鼐等預備之兵前進
若無征行而大同養馬之兵或有遣發則碩鼐率所部

先鋒會師而進又黑龍江之兵既以器械不足來奏難以遠發應遣往右衛屯駐豫備其再議以聞康熙三十六年正月初七日

諭大將軍伯費揚古

駐扎肅州副都統阿南達報稱噶爾丹之子塞卜屯巴爾往爾於哈密地方擒獲正月十六日之夕正觀燈視煙火於暢春園西門諸蒙古及降來厄魯特男婦聚觀其時奏章適至衆皆歡忭汝坐鎮邊荒離朕左右欲汝

聞知令騰阿南達奏章遣往當在新年燈節之時舉國
老幼共皆歡娛相聚適興優游汝在絕塞苦寒荒涼寂
寞之地甚切眷懷爰賜胙肉鹿尾遼魚包瓜諸物問汝
安好為書以喻意朕躬甚安於汝昔見時無異也汝安
好否至噶爾丹當如何殄滅不失機會朕與議政諸臣
議定再降諭旨為此特諭康熙三十六年正月十八日
諭領侍衛內大臣公福善等

頃當春時馬不可即令飲水略拴少時先飼以草然後

飲之諸臣及侍衛執事人員部院衙門通行曉諭康熙三十六年二月初六日

諭領侍衛內大臣

輜裝行時約束最為緊要若照常專令大臣管理視為故事嗣後著大臣二員每旗侍衛十員護軍校三人管束大臣職名每日開列具奏朕親閱派遣侍衛不論新舊輪班派出管轄輜裝馱載或偏即扶助之一遇險阻之地照看管束朕躬時或在輜裝之前或在輜裝之後

巡視查問若違誤必行治罪決不寬恕派出大臣等所
管轄日期每日記之康熙三十六年二月初七日

諭理藩院

差往達賴喇嘛之主事保住及往尼麻唐胡圖克圖之
員外阿爾必特呼所差往事情及所聞信音皆詳悉書
寫交與驛站筆帖式星夜迅速馳奏保住在後速來康
熙三十六年二月初七日

諭大學士伊桑阿

今遣一能言大臣帶領瑚瑚腦兒之渣西把圖爾台吉
之使臣溫布波碩克圖即農之羅壘厄木七波碩克圖
即農之姪厄爾德尼台吉所屬納木喀拉木扎木巴等
前往瑚瑚腦兒之地說瑚瑚腦兒台吉與之偕來令會
議具奏康熙三十六年二月初十日

諭大將軍伯費揚古

朕以二月六日出京於十一日前至宣府觀此時情勢
噶爾丹窮困已極雖欲歸降自彼至此亦豈易易寧夏

地方與噶爾丹所在薩克薩圖胡魯克格隔特哈郎古

特相近已令參領車克楚親近侍衛僧圖等領西安寧
夏兵一百人前至伊克敖拉偵探伊等報稱於二月初
三日起程矣欲令知此故爾遣諭朕意欲令將軍孫思
克博濟領兵三千人為一路出嘉峪關或取道哈密或
取道巴爾庫爾前進車克楚等還時所偵路可行則以
三千兵為一路出寧夏進所新偵路設不可行以兩路
併為一路定所向前進事宜可濟朕今往寧夏親視大

兵糧餉地方情形汝意更復云何特為商略故諭遣往
諦巴主事保住所奏報付去令知康熙三十六年二月
十一日

諭副都御史努赫

汝親身日率科道官各一員留行於輜重之後沿途跟
役人等妄行之徒若有掠奪民物相攘鬪者汝等察拏
指名參奏如汝等不行察拏有在朕前叩閭者於汝等
必不姑容每晚無事則具揭送大學士所康熙三十六

年二月十二日

諭大學士伊桑阿

修治道路若委地方官員則必致太過遣嚮導官法保
布達照朕往哨鹿可行一車之路修治之其山西省道
路著按察使巴錫道員王輔前往董領夫役閱視修治
令侍郎常綬前往於每宿處預備草豆柴薪其後尚書
庫勒納等帶來騾駝所需草豆柴薪亦令伊等預備渡
黃河後陝西道路甚寬無庸大修或有宜略修處亦未

可定常綬法保布達等閱看應修之處指示地方官修治尚書馬齊所擬宿處太近法保布達照現今我軍移營於五六十里擬定宿處若道路過為修治以致累民與地方官無涉皆係法保布達之事著明白曉諭康熙三十六年二月十四日

諭大學士伊桑阿

自古帝王巡行凡所過地方前代帝王陵寢先賢墳墓及名山大川皆行致祭此甚盛典也朕今巡行沿途所

經其有古帝王陵寢先賢墳墓名山大川皆詳察具奏
應致祭者祭之康熙三十六年二月十七日

諭領侍衛內大臣索額圖大學士伊桑阿

大同養馬新滿洲護軍二百人自京隨來新滿洲護軍
一百人其中有馬匹倒斃人材庸劣者留一百人於大
同其餘護軍一百人由邊內隨行一百人令自邊外前
往留於大同護軍百人之馬有肥壯者各取二匹給與
隨行護軍二百人人各一匹黑龍江將軍所領兵既經

遣行其大將軍伯費揚古所需兵不得不預備令撥右衛兵七百名以備調遣右衛兵馬匹缺少侍郎多奇所飼之馬又甚羸瘦前所撥兵二百名其馬六百匹已預為飼養今增撥五百人以上駟院馬一千二百五十匹右衛兵在大同飼養之馬二百五十匹共馬一千五百匹令飼養以備後撥五百兵之用共計兵七百預備馬二千一百匹大同養馬委布喀為首領有馬少不能前隨之司官留二員以副之黑龍江將軍薩普蘇所奏請

充跟役之兵五十名照兵丁支給兩月錢糧一同支給
康熙三十六年二月十七日

諭戶部

沿途既有米糧計行至寧夏日程照大同時價折給銀
兩聽其自便糴買較駝載而往甚為利益其會同議政
內大臣大學士等具議以聞康熙三十六年二月十七
日

諭理藩院

著傳旨諭貝勒松拉卜噶爾丹已將擒獲其子塞卜屯
巴爾住爾已為阿南達俘獲解送旦夕將到今聞噶爾
丹在薩克薩圖胡魯克之南格隔特哈郎古特之地賊
黨僅餘四五百人又瑚瑚腦兒台吉等俱已投降現今
請安之使已至朕躬親往寧夏右翼三旗貝勒公台吉
等共派兵二千人預備爾等蒙古於馱載牧放之事素
為練習可預備以待朕躬至寧夏向何處進兵著候旨
行侍衛綽克拖前往傳旨諭左翼王貝勒貝子台吉等

爾等聞朕往寧夏其由徑路請安俱著停止爾等有願
効馳驅者俱赴松拉卜貝勒處等待聽候指示以行康
熙三十六年二月十七日

諭領侍衛內大臣索額圖等

侍郎多奇於去年九月飼馬其後始遣侍郎阿爾裨飼
馬多奇所飼之馬既多數月較之阿爾裨所飼之馬羸
瘦著交與領侍衛大臣大學士嚴加議處具奏康熙三
十六年二月十七日

諭領侍衛內大臣索額圖大學士伊桑阿

觀衆所乘之馬腹皆不飽買草弗得亦未可定邊內行走官員侍衛護軍執事諸人所乘馬匹察明數目沿途有草則給草束無草則給銀兩具議以聞康熙三十六年二月十七日

諭右衛將軍偏俄山西巡撫倭倫

頃給發右衛官員兵丁米豆草價值較時價減少以致窮兵苦累亦未可定又詢察大同府所屬州縣衛所之

民運送右衛官兵馬匹所用草束苦累可將兵丁之馬
各留一匹於右衛餘馬發附近州縣衛所酌派官員兵
丁看守飼養小民可免運送之苦此後每草一束應作
何給價傳諭議政大臣大學士及在事官員爾等亦同
會議具奏康熙三十六年二月十八日

諭侍郎安布祿

朕自邊內往寧夏可令爾衙門司官一員住沙虎口有
來請安貢獻者向伊等言皇上起程去遠矣爾等雖往

亦無益俱令之回朕行至寧夏令此司官由邊外來赴
寧夏康熙三十六年二月十八日

諭大將軍伯費揚古

汝二月十四日所奏事於十六日晚至朕於十七日抵
大同兵馬俱分派明晰朕躬於十九日啟行從邊內往
寧夏黑龍江兵丁俱率之而行派右衛兵七百人各給
以御馬羣等處現餵馬匹令其預備俱明白交與右衛
將軍偏俄今噶爾丹困蹙情狀如此斷然不致用兵萬

一噶爾丹有前來消息速致信來朕由寧夏進兵以襲其後今或噶爾丹所屬之人來降或遣使來皆詢問詳明即速奏聞少其人數陸續遣來又汝軍前所有察哈爾兵及黑龍江兵之米若盡于成龍等所運米且勿支動將歸化城米儘其足用取來給與此米若移取太艱則於一千五百石內以五百石撙節給用其千石不可輕動特諭康熙三十六年二月十九日

諭山西巡撫倭倫陝西巡撫黨愛甘肅巡撫郭洪

朕比年出師剿寇總期久安邊徼永輯民生茲厄魯特
噶爾丹業已勢蹙力窮畏死悔罪遣使具奏乞降朕特
親統六師再臨邊塞相機剿撫因欲乘便循覽邊境形
勢並察視軍民生理遂遣發禁旅取道邊外朕自大同
從內地前赴寧夏一路地方見緣邊州縣地土瘠薄軍
民生計艱難朕心深切軫念一切御用所需皆自內廷
措辦不以煩民庖從人員俱極簡少市易之物悉依時
值誠恐有強取抑價等事已令都察院及科道官逐日

稽察糾劾其經過城堡衢市輒多結綵亦殊覺擾累嗣
後著通行停止乘輿巡幸本為安民豈可反勞民力爾
等務嚴飭有司不得借端妄行科派仍張示曉諭俾窮
簷編戶咸悉朕曲體民依至意特諭康熙三十六年二
月二十日

諭領侍衛內大臣索額圖

頃因雨雪或在邊內或在邊外馬騾拴住皆用氊蓋不
可怠忽可通諭衆人知之康熙三十六年二月二十四

日

諭領侍衛內大臣及嚮導官

來日駐蹕於李家溝其地但有一小泉一井已駐水三百甕豫備作何料理分給著議奏康熙三十六年二月二十五日

諭領侍衛內大臣

今年雨雪凡駱駝及馬騾之鞍皆勿卸善為遮蔽可以此通諭衆知之康熙三十六年二月二十六日

諭山西巡撫倭倫

朕撫御區宇念切民依故不憚勤勞親歷邊境惟孳孳以靖寇安民為急茲簡約扈從人員從大同一路緣邊地方進指寧夏因徧察閭閻生聚及土壤肥瘠收穫豐歉之狀見邊氓生計維艱朕心深用軫惻雖一切供御之物纖毫不以累民而乘輿巡幸經臨宜特敷庥澤以示恩恤除大同府額賦已有諭旨豁免外其經過奇嵐州河曲縣保德州所屬地方並各衛所康熙三十六年

應徵地丁銀米著通與蠲免爾即行令該管官員張示
遍諭務俾窮鄉僻壤均霑實惠以稱朕子育黎元至意
特諭康熙三十六年二月二十七日

諭兵部

朕觀綠旗營馬皆肥壯伊等現無調遣俟至神木將隨
行瘦馬易營馬一百匹至榆林時易營馬二百匹果係
瘦者方令更易每馬貼銀五兩令各馬主增給則隨行
馬之瘦者可乘肥馬綠旗兵又皆得銀交為有益易馬

之人並旗分佐領其所易何營之馬與綠旗兵姓名馬之數目明白開寫奏聞著領侍衛內大臣大學士會同兵部詳議具奏康熙三十六年三月初一日

諭侍郎安布祿

選爾衙門賢能司官一員令出神木邊由邊外至榆林道路幾程水草若何可詳悉問明俄爾多斯蒙古仍至神木候旨康熙三十六年三月初二日

諭員外郎薩哈連

汝即前往出榆林邊詢問蒙古自榆林由邊外至寧夏道路來至榆林候旨康熙三十六年三月初四日

諭議政諸臣

將軍孫思克博濟之兵進剿則噶爾丹勢迫逃奔而東亦未可定今派寧夏所有西安兵八百名綠旗兵一千名京城前鋒兵二百名令攜帶百日口糧遣往郭多里巴爾哈孫駐扎偵探堵禦其所運送之米自寧夏載之舟中由黃河順流而下至河干分路時然後以駝騾負

載隨營運送駝騾自寧夏閒散趕赴其隨營運米之處
著將軍馬思哈會同于成龍等議奏康熙三十六年三
月初五日

諭議政諸臣

朕至寧夏始調遣甘肅之兵恐致遲誤正當噶爾丹困
迫之時西安滿洲兵二千名綠旗兵一千名備於甘肅
日久馬已肥壯機會斷不可失宜速令進兵於薩克薩
圖胡魯克一帶搜剿各攜百日口糧薩克薩圖胡魯克

距嘉峪關不遠米糧不必隨運噶爾丹若遠行逃遁則進剿之兵計米而旋凡進剿滿洲綠旗官兵皆令賞銀十兩儻另有可行事宜及奏請之處孫思克博濟阿南達等商酌議奏自哈密擒送俄木克圖哈西哈遣赴將軍孫思克軍前有可進兵機宜即宜進兵剿滅則俄木克圖哈西哈不必差往若噶爾丹逃遁已遠則遣俄木克圖哈西哈往噶爾丹處令言我軍非事征戰實來撫汝汝宜來降其寧夏之兵駐於郭多里巴爾哈孫令其

堵禦之處亦應行文知會孫思克等著會議具奏康熙
三十六年三月初五日

諭大學士伊桑阿

州縣已各論其地方大小積貯米穀兵丁所駐沿邊衛
堡亦屬緊要其榆林等處衛堡亦照州縣大小中積貯
之例將捐納米穀積聚預備著交與該巡撫康熙三十
六年三月十一日

諭大學士伊桑阿等

今日驛程甚遠致馬疲苦其間增設一驛明日所宿中
途亦增設一驛每驛設馬二十匹他若較此為近或四
十五十里者則不必增設驛程康熙三十六年三月十
一日

諭大學士伊桑阿

安邊磚井鹽城舖莫布拉等九處水泉不多應豫遣人
增添掘井爾與兵部會議遣嚮導一人前往康熙三十
六年三月十三日

諭兵部

前鋒侍衛奇薩穆長史庫即根著委為首領併侍衛進
木巴護衛穆渣哈兒嚮導護衛阿那達老卜臧席拉布
西喇卜及寧夏所有新滿洲三人奇薩穆挑選帶往伊
克敖拉巴漢敖拉觀看地形此十人各隨人役一名各
乘肥馬三匹所需之馬不必動用官養馬匹令總督吳
赫等將伊等肥馬與之乘騎無弓矢撒帶腰刀烏鎗者
俱料理全備令其前往康熙三十六年三月十四日

諭議政諸臣

寧夏之兵於三月十九日起程暫令停止馬匹臚力如何米糧作何料理並未明白奏陳著行文詢問之康熙三十六年三月十五日

諭大學士伊桑阿

可行文寧夏諸臣毋得勞頓馬匹遠道來迎大臣等惟本身於黃河彼岸迎接官員兵丁俟朕到寧夏之日於近城地方步行迎接康熙三十六年三月十七日

諭護軍統領托倫等

今日天雨且寒駱駝馬騾但得草飼秣或在營中或在城內各從其便其在野牧放之駱駝馬騾善加遮蔽可
以此諭衆及內府佐領咸令知之康熙三十六年三月
十九日

諭領侍衛內大臣

今日駐蹕之地井泉稀少其有力者不必言其貧微者
不獲飲馬亦未可定原派四人一夥明日各親看飲馬

管轄之官亦加詳察若違朕旨不行飲馬朕若知之決不輕恕以此通行曉諭執事人員咸令知悉康熙三十六年三月二十日

諭大學士伊桑阿

趙良棟乃為國宣力建功之人今已身故不必以其躁急性褊為意來朝經過其門欲遣皇長子及部院諸臣往視致祭一次陳福曾為國効力適至此地亦應致祭一次可與議政大臣滿漢大學士部院諸臣會議具奏

康熙三十六年三月二十五日

諭大學士伊桑阿

朕躬親至此地寧夏陣亡官員兵丁宜察明加恩陣亡
官員有遣官奠酒之例如有陣亡官員應遣官致奠康
熙三十六年三月二十六日

聖祖仁皇帝御製文第二集卷二十七

欽定四庫全書薈要

聖祖仁皇帝御製文第二集卷二十八目錄

北征勅諭

諭陝西四川總督吳赫

諭大學士伊桑阿

諭兵部

諭議政大臣等

諭議政大臣

諭兵部

諭議政大臣

諭寧夏文武官員兵民人等

諭大學士伊桑阿

諭大學士伊桑阿

諭大學士伊桑阿

諭將軍馬思哈

諭大學士伊桑阿

諭大學士伊桑阿

諭議政大臣

諭議政大臣等

諭議政諸臣

諭陝西總督提督巡撫總兵等官

諭理藩院

諭議政大臣

諭議政大臣

諭總兵官王化行

諭大學士伊桑阿等

諭領侍衛內大臣

諭議政大臣

諭議政大臣

諭議政大臣

諭兵部

諭議政大臣

諭議政大臣

諭議政大臣

諭議政大臣

諭戶部

諭議政大臣

諭領侍衛內大臣

諭大學士伊桑阿

諭大學士伊桑阿

諭領侍衛內大臣

諭議政大臣

諭議政大臣

諭太僕寺

諭侍郎安布祿

諭吏部

欽定四庫全書薈要卷一萬三千五十六集部

聖祖仁皇帝御製文第二集卷二十八

北征勅諭

諭陝西四川總督吳赫

朕巡幸沿邊地方詢察閭井生聚及土田沃瘠之狀自
晉歷秦經行二千餘里直抵寧夏所以勤求民隱至殷
且切惟朔方資大河之灌注疏渠溉田宜於稼穡當茲
春氣鬯遂正三農盡力南畝之時誠恐有司官員不體

朕懷因車駕經臨調遣師旅借辭供億擾累小民既東
作之有妨將西成之奚望今一切軍需芻糗俱經儲備
足以資用至扈從人員槩從簡約所有馬匹悉牧放水
草善地並不須以供辦草豆動煩民力爾可傳飭有司
禁勿借端妄行科派違者事覺定行處分仍徧諭地方
百姓務各安本業廛無廢市隴無輟耕庶不負朕親歷
邊圉軫悉民依之至意特諭康熙三十六年三月二十

七日

諭大學士伊桑阿

朕躬親至此地寧夏之官員兵丁去年於昭木多翁金
地方拒戰陣亡者察明具奏其議叙之處該部照常議
敘外官員遣侍衛慰問兵丁身銀即於此地給發康熙
三十六年三月二十八日

諭兵部

寧夏之兵約至郭多里巴爾哈孫應移文大將軍伯費
揚古統兵前來會合康熙三十六年三月二十八日

諭議政大臣等

隨往之大臣侍衛護軍執事人部院官員名數詳悉察
明其所需口糧詳悉計算又大臣侍衛執事人員有馬
匹羸瘦者其馬匹數目及人名數亦詳悉察明其部院
司官馬瘦者令住於蒙古驛站康熙三十六年三月二
十八日

諭議政大臣

朕差往噶爾丹之使員外郎博席希筆帖式長壽回來

已至喀倫地方格壘沽英攜其妻子已來投降噶爾丹
亦遣使前來先行報聞人猶未至俟來到時噶爾丹或
來投降或往何處詢問明白然後可以進兵現今孫思
克博濟兵速行文停其進剿待明晰情由行文知會之
時然後進兵康熙三十六年三月二十九日

諭兵部

黑龍江之兵効力心切故薩卜蘇奏稱其馬臚肥壯耳
朕今日閱城見黑龍江官兵馬匹臚力甚歉乘此難以

遠歸伊等遇有調遣朕給與馬匹令彼騎乘伊等之馬
一千七百匹令於察罕托海之地牧放遣人送至歸化
城征剿事竣伊等仍各乘其馬回至本省甚易如此則
草豆既省馬亦有益會同薩卜蘇議奏康熙三十六年
閏三月初二日

諭議政大臣

大兵起程少緩則米糧應先運至白塔爾等會同運米
左都御史于成龍將現有船隻量留渡船餘船皆令載

米運至白塔所有水手不甚諳練其黑龍江之兵用船最熟此番運米著領本地水手乘此時運送兩次大兵所攜四箇月米糧今自白塔攜帶甚有裨益著會同于成龍等議奏康熙三十六年閏三月初二日

諭寧夏文武官員兵民人等

朕體天育物日以治安為念雖身在宮庭而心恒周四海頃因指畫軍務不憚勤勞遠蒞寧夏無非為蕩滌寇氛綏乂生靈計也緣邊千餘里土壤磽瘠惟寧夏洪流

灌輸諸渠環匝巡覽所至甚愜朕懷夫農桑者衣食之本積儲者殷阜之原爾官吏宜董勸父老子弟三時力田以盡地利比屋勤殖以裕蓋藏縱使歲偶不登亦可無憂匱乏若夫秦風健勇自昔為然其在朔方尤勝他郡爾等或職居將領或身隸戎行尚各勵精銳以効干城禦侮之用斯國家有厚賴焉至於忠信慈惠服官之良軌孝弟齒讓生人之大經法紀不可不明禮教不可不肅勿以地處邊陲而不治以經術勿以習尚氣力而

不澤於詩書總期上率下從庶幾馴臻雅化茲乘輿返
蹕距靈朔雖遠而睠念塞垣如在几席爾等誠能敬體
朕言將吏協恭兵民咸理生聚日益厚風俗日益淳則
疆圉實有攸裨朕心亦用深慰慎勿視為具文辜朝廷
惓惓牘導之意欽哉特諭康熙三十六年閏三月初二
日

諭大學士伊桑阿

今寧夏綠旗兵已撥五百人以備征剿如兵不遣行則

已若行每名亦賞銀十兩康熙三十六年閏三月初三日

諭大學士伊桑阿

甘肅肅州涼州等處兵士去年與厄魯特拒戰時陣亡被創官員兵丁遣兵部司官一員馳驛前往會同該管官察明原冊給與身銀傷銀康熙三十六年閏三月初三日

諭大學士伊桑阿

朕巡省方域至於寧夏寧夏之官員兵丁去年於昭木
多翁金拒戰陣亡官員兵丁給與身銀外其被創官員
兵丁亦察明原冊給與傷銀康熙三十六年閏三月初
三日

諭將軍馬思哈

今噶爾丹勢極困蹙我兵衆多遣用不盡而行路亦覺
煩擾烏鎗護軍六百人前鋒五百人黑龍江兵四百人
綠旗兵五百人此二十儘可足用所派前鋒及黑龍江

之兵需用駝馬俱經奏明其烏鎗護軍及砲火兵丁現各有馬四匹之外其各增馬一匹著取所留四百兵之馬添為五匹除有駱駝之人其無駱駝者兩人共給駱駝一隻所需駝馬併帶回四月口糧數目察明奏聞康熙三十六年閏三月初六日

諭大學士伊桑阿

前往綠旗兵五百人人賞銀十兩其即給與隨朕前來兵士行糧給至某月察明具奏庫勒納等帶來駝騾與

兵部會看具奏康熙三十六年閏三月初九日

諭大學士伊桑阿

進剿兵給六月行糧隨朕前來兵給三月行糧其所需錢糧數目察明具奏康熙三十六年閏三月初九日

諭議政大臣

隨朕前往大臣官員及殷實之人各攜帶本身口糧外有願帶官米或幾石或幾斗量其所能攜往白塔者令各攜至俟攜至白塔時給散兵丁其宣示於衆攜帶之

人所攜之數開具以聞康熙三十六年閏三月初九日

諭議政大臣等

孫思克博濟所將兵前曾撥三千人念兵馬衆多征行
煩苦今選發滿洲綠旗兵二千人其所留兵丁馬匹增
給前往之兵攜帶四月口糧遣赴阿南達處阿南達李
林隆即統領此兵前往搜剿孫思克博濟率所留之兵
暫駐甘州於事理為宜其于成龍運米停駐之所亦應
遣兵防護可令西安副都統阿蘭泰領西安兵三百人

前往駐扎再留駐寧夏之京城前鋒每旗二十人及鳥鎗護軍砲火兵丁量行撥出隨朕前行餘仍令暫駐寧夏命大臣一人統轄大將軍伯費揚古知會附近旗分蒙古王貝勒貝子公台吉等有願自備四月餼糧効力行間者即令前來効力又費揚古軍前黑龍江兵一百人並令帶往酌照四月口糧選察哈爾兵攜四月糧會合於郭多里巴爾哈孫之地咸令統轄其費揚古駐扎之地著舒恕料理侍郎滿丕仍駐扎原處康熙三十六

年閏三月初九日

諭議政諸臣

輓運糧餉及隨營設站之事朕與鄂爾多斯松拉卜貝
勒言之彼奏稱青草生時我兵三千能運米設站今應
自白塔以外運米設站俱委鄂爾多斯松拉卜貝勒令
會同于成龍商酌而行白塔以內安設驛站之事交與
總督吳赫西安副都統阿蘭泰兵三百名亦交與于成
龍其馬思哈等所統之兵若止攜帶一月口糧其三月

口糧及隨營之米載於船內一次不能全完必須再運則大兵豈可無故守候應令馬思哈等之兵攜帶兩月口糧其餘米用船輸運所剩之米衆力攜帶僅再有餘剩令于成龍等酌量運至白塔大兵到白塔其間計十二日口糧將衆力駝載之米補給松拉卜貝勒于成龍等隨營遞運之米應抵於何地應停於何地著大將軍伯費揚古參謀大臣會同于成龍商酌定議爾等與于成龍詳議具奏康熙三十六年閏三月初十日

諭陝西總督提督巡撫總兵等官

朕宵旰勤民慮周遐邇緣向來巡幸未經親歷邊境頃特濟河而西循秦省沿邊地方延覽風俗咨詢疾苦見所在兵民築土室以為居耕沙磧以為業生聚之計甚屬艱難朕惻然於衷軫念勿釋因思兵民倚賴全在將吏而將吏之表率惟督撫提鎮是視誠使督撫提鎮實能正己澄源則所屬守職奉公祿足自贍必無朘削兵民之事倘或積習相仍濫受屬員私餽因而所屬官弁

節次求索取償於下文官則加徵無藝武弁則侵剋月
餉勢不至於厲民剝兵不止如此而欲冀疾苦日蘇生
聚日盛烏可得乎夫秦地俗尚素樸簡樸邊方士卒允
屬精強總恃撫馭得人斯於兵民胥益朕茲駐蹕寧夏
特召該省總督總兵以下官員凡在鎮城者俱賜宴內
庭面加諄諭無非期望文武大吏董率屬員以仰副朝
廷愛民恤兵至意自今以往爾等其益體朕懷交相砥
礪文職皆習知民事豈身作官吏不恤百姓之依武職

多起自行伍豈甫為將領遽忘軍士之苦上官克謹廉隅屬員各遵法紀馴至比屋殷阜列戍飽騰則兵民皆得所而爾等亦與有休寵以視厲民剝兵身名俱隕者孰得孰失爾等其敬念之特諭康熙三十六年閏三月初十日

諭理藩院

護軍統領鄂克濟哈既駐寧夏其現在厄魯特男婦幼稚共三十八名交與鄂克濟哈其所食之物照常給與

此後由此路來降之厄魯特俱令鄂克濟哈於寧夏收
養來降及各處送來之厄魯特令鄂克濟哈將人名男
婦幼稚明白開具報聞有新自噶爾丹處來人及緊要
人將本人及所送到數明白開具送至行在有指名調
取者則照名送來鄂克濟哈所養之厄魯特將來送至
何處著候旨行康熙三十六年閏三月十三日

諭議政大臣

移會大將軍伯費揚古自寧夏前往大兵閏三月十七

日起程費揚古可率所領兵以四月初十外十五內至郭多里巴爾哈孫康熙三十六年閏三月十三日

諭議政大臣

寧夏蘭州兵丁駐防事屬無益此所占營房原皆民居給價撥用者今取原價還官其房仍歸原主議政諸臣會同總督議奏康熙三十六年閏三月十三日

諭總兵官王化行

爾去歲進剿噶爾丹効力行間人材壯健隊伍整齊勞

績懋著大將軍伯費揚古陞見亦曾以効力奏聞綠旗
總兵官無預會議之例特命爾於今次出師預會議事
賜戴孔雀翎康熙三十六年閏三月十四日

諭大學士伊桑阿等

本月二十三日以前自京送來與自此發往之事仍馳
舊驛二十三日之後自京來之事則出沙虎口由新設
驛站行自此發往之事則由新設驛站進沙虎口遞送
二十三日以後內地舊設驛站外新添馬匹令總督吳

赫撤回其西路驛站著總督整飭康熙三十六年閏三月十五日

諭領侍衛內大臣

昨日間處處多有喧雜之聲此皆八旗官兵來會於此雖覺喧雜朕含容之此後須嚴禁喧雜又見輜裝行路皆無序次此後皆須整肅隊伍毋得妄行康熙三十六年閏三月十六日

諭議政大臣

羊為軍中所需食物馬思哈等將此羊八千九百十二

隻應特委能員於兵未起程乘早寒涼時尋好水草驅
送前行乃不特委專官牧養前赴以致羊三千疲乏且
將疲乏之羊不委道員等大官而委之把總如此驅送
其所存五千九百餘羊一二日之間又將報疲乏矣其
送羊隻撥兵多少所委何官亦應察詢爾等以馬思哈
等同為大臣故徇情面若朕有何瞻顧耶著再議具奏
康熙三十六年閏三月十九日

諭議政大臣

孫思克所將兵丁衆多自足遣用其固原兵二千又遣
往孫思克所則兵丁殊覺煩苦著會議具聞康熙三十
六年閏三月二十二日

諭議政大臣

據多羅額駙阿拉卜渾台吉得木楚克奏稱瑚瑚腦爾
台吉渣西把圖爾等來朝若於原野之間候其來至大
禮亦未相符況四月起程而來邊內途間炎熱若令秋

時來朝似為有當議政大臣會同阿拉卜潭得木楚克
議奏康熙三十六年閏三月二十五日

諭兵部

原任侍郎趙山交與將軍馬思哈與原任侍郎思格則
同趕送牛羊前途或有差遣招降噶爾丹及可効力之
處遣伊等行康熙三十六年閏三月二十七日

諭議政大臣

官米每駱駝令載倉斛一石運至兩狼山大臣侍衛官

員執事及殷實之人本身既不進剿著察其肥壯駱駝載米轉送不必更令乘馬即附駱駝以前駝數著察明具奏康熙三十六年閏三月二十八日

諭議政大臣

朕自寧夏至此見有死者骸骨皆因去歲運米措處失宜人遭饑餒以致喪亡舊歲中路進兵各驛站儲待糧米旋師之時兵卒商旅量行給與未致饑餓死亡今次進兵所關緊要凡事不得不籌畫周詳朕遣往寧夏取

米五百石到時留駐於此湖灘河朔向有積貯米粟其
大臣侍衛官員執事人護軍等寧夏所支兩月之米食
至此地者令開除之從此至湖灘河朔所食之米令計
數攜去其所餘者俱令留此隨來之兵亦著量留命一
大臣駐此管轄其駐此之大臣將所留米陸續緩運酌
留於各驛站俟回旋兵卒商旅有絕糧者即煮粥食之
庶我軍有所接濟矣上駟院閒馬一千四百匹亦留此
於好草之地牧放肥壯其回旋之兵有馬匹艱難者給

與騎乘而我軍在後疲弱之馬亦可至矣鄂克濟哈仍駐寧夏凡由驛站遞傳之事俱由邊外新設驛站馳送程途既近又無阻滯其總督吳赫所設船站驛站仍照常安設其船站以外令設蒙古驛站議政諸臣會議具奏康熙三十六年四月初一日

諭議政大臣

載米駱駝明早起程令內大臣明珠都統噶爾馬王永譽率領中途一宿次日到彼明珠即還噶爾馬王永譽

留彼護守明珠還時將駱駝加意帶回康熙三十六年四月初一日

諭議政大臣

自寧夏起程往擒伊拉固克三胡圖克圖之大臣官員兵丁回時西安之兵仍赴寧夏其由西路往擒伊拉固克三胡圖克圖之西安綠旗官兵俱令赴甘州京城之大臣官員兵丁回時或駐於此或赴京城著會議具奏康熙三十六年四月初三日

諭戶部

隨來之大臣侍衛官員兵丁執事人等扣回二十五日
糧米共計多少此米給與所留二百護軍及官員四月
之口糧更餘米多少明悉詳察具聞康熙三十六年四
月初三日

諭議政大臣

頃諸事俱畢惟噶爾丹子身僅存大兵搜剿深入不久
旋師路必由此今令每站貯米凡師回乏糧者即行支

給其商人則煮粥食之投降之厄魯特以及瑚瑚腦兒
來降之台吉等俱經此路米石馬匹咸留於此此間料
理事務最為扼要朕欲躬親駐此思天下幾政所關其
鉅朕故回師至領侍衛內大臣原屬禁衛扈從要職數
日以來再三籌度此任最重故以領侍衛內大臣索額
圖留駐茲地都統阿錫坦噶爾馬王永譽護軍統領蘇
赫副都統巴塞亦留此其應料理事宜所留駐大臣與
隨朕大臣會同詳晰議奏康熙三十六年四月初五日

諭領侍衛內大臣

舟行時諸臣俱各約束令魚貫而行視前船停泊後船即住自不致喧譁爭競而行時亦不擾亂嗣後大臣各各嚴行管轄康熙三十六年四月初八日

諭大學士伊桑阿

據山西巡撫倭倫以去歲山西數州縣歉收今米價甚貴奏聞頃噶爾丹殲滅天下悉已無事惟愛養兵民是為要務山西米價騰貴民生困苦朕聞之中懷軫惻卮

從前來大臣侍衛官員執事人自船站坐來船隻現有
水手至湖灘河朔時此船隻若逆流牽挽回至寧夏甚
難曾諭總督吳赫就此船隻將湖灘河朔積貯米或三
千石或再加多量行裝載遣賢能官順流而下運至保
德州比時價減少糶賣於民大有裨益此事爾等議之
待至湖灘河朔奏聞康熙三十六年四月十六日

諭大學士伊桑阿

朕今日有報遣往京城或內來之報及一切事件俱令

由張家口遣發已有諭旨爾等亦於驛站官員明悉行文令皆由張家口遞送選理藩院司官或筆帖式一人遣往大同收接凡西路齎送事宜俱令由邊外赴送俟朕進張家口時仍由內地驛站馳送康熙三十六年四月二十九日

諭領侍衛內大臣

今日駐紮之地與蒙古相間雜而處著曉諭我軍以至僕役恐有盜竊蒙古馬匹之人若有盜馬者一經發覺

即照蒙古盜我軍之馬一例正法以此交各該管之人
通行曉諭康熙三十六年五月初一日

諭議政大臣

大將軍伯費揚古處有因罪發往軍前効力者今進剿
之路伊喇固克三胡圖克圖之人及厄魯特潰散之人
處處多有之差往丹即拉處應用發往軍前効力之人
令散秩大臣丹巴前往失於輕忽著會議具奏康熙三
十六年五月初二日

諭議政大臣

遣往丹即拉處應差因罪發往軍前効力之趙山思格則等伊等皆素行乖亂善於營求故諸臣瞻徇情面不行差遣致遣散秩大臣丹巴丹巴此行遇兇惡之徒亦未可定今將伊等派一人於丹津汪布處一人於阿拉布灘處各用自備馬匹偕蒙古司官筆帖式前往告以噶爾丹既死即使伊等招降務令阿拉布灘丹津汪布投順與之同來儻事不成或未至其地半途而回大將

軍即於彼處正法示衆康熙三十六年五月初三日

諭太僕寺

厄魯特之台吉等馬各百匹散秩大臣等馬各八十匹
一等侍衛等馬各五十匹二等侍衛以下閑散人以上
馬各三十匹將爾衙門馬羣之馬頒賜康熙三十六年
五月初五日

諭侍郎安布祿

昨日諸王貝勒等隨朕閱視馬羣今特加賜賚阿巴海


之多羅卓里克圖郡王達馬林扎卜多羅郡王吳爾占
噶拉卜蘇尼特之多羅杜稜郡王達里扎卜高齊特之
多羅郡王燕木品爾等馬各五十匹阿巴哈納爾之多
羅貝勒卜兆阿巴海之固山達爾漢貝子車嶺敦魯卜
阿巴哈納爾之固山貝子額林陳達西等馬各三十匹
康熙三十六年五月初六日

諭吏部

溫保居官甚劣苛虐百姓至於已極前乃自奏其居官

甚善萬民贊美欲為樹碑由今觀之沿途衆庶無有不
願食其肉而怨讟之者且溫保非比他人彼曾為學士
朕愛養百姓之心豈不知之甘度居官亦最庸劣今蒲
州民變入山若輩如能素勤撫卹百姓豈遂抗匿至此
倭倫往彼招撫儻不順從欲將溫保甘度拏赴彼處正
法然後用兵今思其服官污濁朘削小民殊為可恨此
等貪官不加誅戮衆不知儆著議政大臣部院堂官會
同議奏康熙三十六年五月十二日

聖祖仁皇帝御製文第二集卷二十八



總校官庶吉士臣侍朝

校對官檢討臣郭寅

膳錄監生臣藍嘉瑄